

Matumuuna Inatsisartut suleriaasianni § 33 naapertorlugu aalajangiiffigisassatut siunnersuut una Naalakkersuisunit saqqummiunneqarpoq:

Kalaallit Nunaanni Eqqartuussisarnermik inatsisip inatsisillu allat assigiinngitsut allanngortinneqarnissaannut inatsisissatut siunnersuummut missingiut pillugu (Politiit pillugit aaqqissuusseqqinnermik, politiinik naammagittaalliutiginnaannermik nutaamik aaqqissuusinnermik pilersitsinnermik il.il. naammassinnerneq) Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Tungavilersuineq

Kalaallit Nunaanni Eqqartuussisarnermik inatsimmut aamma inatsisinut allanut allannguutissatut siunnersuummut missingiut (Politiit pillugit aaqqissuusseqqinnermik, politiinik naammagittaalliorsinnaannermik nutaamik aaqqissuusinnermik pilersitsinnermik il.il. naammassinnerneq) Naalakkersuisut tigusimavaat.

Piffissami nutaajunerusumi Kalaallit Nunaanni politiinut unnerluussisussaataasunullu atugassarititaasut pillugit aatsaat taamak annertutigisumik aaqqissuusseqqittoqarnissaa inatsisissatut siunnersuut manna aqutugalugu siunnersuutigineqarpoq.

Inatsisissatut siunnersuut ilaatigut politiinik unnerluussisussaataasunillu aaqqissuusseqqinnissamik siunertaqarpoq, taamaalilluni nunap immikkoortuani politiit naalagaaffimmi nunap immikkoortuani politiit allatulli aaqqissuussaanikkut naligiissinnerqassallutik. Tassunga atatillugu inatsisissatut siunnersuuttip Danmarkimi allannguutit 2007-imi naammassineqarsimasut pingaarnertut tungavigai, tassani ilaatigut politiit aaqqissuussaanermikkut agguataarneqarnerat aamma politiit najukkani inuiaqatigiinnut attaveqarnerat allanngortinneqarput.

Aalajangersakkat nutaat, inatsisissatut siunnersuutikkut akuerineqartut, qallunaat eqqartuussisarnermut inatsisaanni aalajangersakkanut naapertuutlernissaat, aamma taamaallaat Kalaallit Nunaanni pissutsinik tungavilerneqarsinnaappat aallaavimmit taassuminnga saneqqutsisoqarsinnaasoq, taamaalilluni aallaavigineqarput.

Inatsisissatut siunnersuummi immikkoortut pingaarnertut tassaapput:

Aqutsisut politiinillu aqutsineq

Ullumikkut Kalaallit Nunaanni Politiit pingaarnertut inatsisinik atuutsitsinnermut ministereqarfiup akisussaaffigai, politiinullu qullersaalluni. Taamaalilluni Kalaallit Nunaanni politimesteri politiit suliarinninnerat pillugu inatsisinik atuutsitsinnermut ministerimit suliakkiissutinik naalakkerneqarsinnaavoq, aamma politiit pillugit apequtit pillugit politimesterip aalajangiussai inatsisinik atuutsitsinnermut ministerimut naammagittaalliutiginneqarsinnaapput.

Taamatut allannguissamik siunnersuuteqarnikkut inatsisinik atuutsitsinermut ministeri politiinut qullersaalluni suli akisussaasuusaaq, kisianni Justitsministeeriaqarfimmit politiinik qullersatut aqutsineq - nunap immikkoortuani allani politiini pissutsit atuuttut assigalugit - matumani ukiumoortumik direktørimumut isumaqatigiissuteqarneq aqqutigalugu - siunissami naalagaaffiup politiivisa pisortaannit ingerlanneqalissasoq tassani piumasaqaataavoq. Politiit sulinerannut malittarisassat nalinginnaasut siunissami aallaaviatigut naalagaaffiup politiivisa pisortaannit aalajangersarneqartalissapput, taannalu Kalaallit Nunaanni politiit suliaannut tunngasunik suliarinninnermut tunngatillugu aalajangiisinaanermut pisinnaatitaassaaq.

Kalaallit Nunaanni Politiit pisortaanerata taaguutaata “politimester”-imiit “politidirektør”-imut allangortinneqarnissaa siunnersuutip kinguneraattaq, taamaalilluni nunap immikkoortuani 14-ini politiit pisortaanerisa pisortatigoortumik naligiissinneqarnerat erseqqissarneqarpoq.

Najukkani inuiaqatigiinnik politiit attaveqarnerat

Najukkani inuiaqatigiinnik politiit attaveqarnerisa patajaallisarneqarnissaat siunertaralugu nunap immikkoortuani siunnersuisoqatigiinnik pilersitsisoqarnissaa Justitsministeeriaqarfimmit siunnersuutigineqarpoq, tassani Kalaallit Nunaanni Politiini aqutsisut qullersaat, Isumaginninnermut Inatsisinillu Atuutsitsinermut Naalakkersuisoq aamma borgmesterit ataatsimoorullugu soqutigisaminnik oqallinnissamut periarfissaqassapput.

Politidirektørip nammineerluni politiit Naalakkersuisunik kommuninillu suleqateqarnerisa aqqissuunneqarnissaanik akisussaaffeqarnerata erseqqissarneqarnissaa siunertaralugu, nunap immikkoortuani siunnersuisoqatigiinni politidirektørip siulittaasunnngornissaa siunnersuutigineqarpoq.

Nunap immikkoortuani siunnersuisoqatigiit politiit Kalaallit Nunaanni sulinerat aqqissuussaananerallu pillugit apeqqutit nalinginnaasut pillugit oqaluuserinnittassasut siunnersuutigineqarpoq. Ingammik suliassaqrifiit politiit kommunillu suliassanik isumaginninnerannut attuumassuteqartut ataqatigiissinneqarnissaasa qulakkeerneqarnissaanik pisariaqartitsineq oqaluuserissallugu naleqqutissaaq, assersuutigalugu meeqqat inuusuttuaqqallu aarlerinartorsiorlutillu artorsartinneqartunut pillugit suliniutit eqqarsaatigalugit. Taamatuttaaq nunap immikkoortuani siunnersuisoqatigiit najukkani inuiaqatigiinnut immikkut pingaarutillit pillugit apeqqutinik oqaluuserinnittarnissaat siunnersuutigineqarpoq, assersuutigalugu nunap immikkoortuani politiini, ammasarfinni il.il. allanguinerit.

Inatsisissatut siunnersuut malillugu Kalaallit Nunaanni pinerluttarnerit ineriartornerat aamma najukkani pinerlunnissamut pitsaaliuinerit siunnersuisoqatigiinni oqaluuserineqartassapputtaaq, aamma tamanna arlalitsigut politikredsiq ilaani assigiinngitsuni pinerlunnermik ajornartorsiuqarnerup pissusia, annertussusia ineriartorneralu pillugit politiit misissueqqissaarnerat tunngavigalugu pisinnaavoq.

Tamatuma saniatigut inatsisissatut siunnersuut malillugu politiit atuuffii pillugit, matumani pinerluttaalisitsiniarneq suliniutit ilanngullugit, nunap immikkoortuani siunnersuisoqatigiit najukkani innuttaasunut paasisutissiissutigineqarnissaat sulissutigisassavaat.

Ukiumi qaangiuttumi politiit suliarisimasaat pillugit politidirektøri nunap immikkoortuani siunnersuisoqatigiinnut allaganngorlugu ukiumoortumik nassuiaasiortassasoq siunnersuutigineqarpoq.

Nunap immikkoortuani siunnersuisoqatigiit politikredsiq nalinginnaasumik aqqissuussaanaera pillugu apeqqutit pillugit oqaaseqaateqartarsinnaasut, aamma politiit piffissap killeqartup iluani isumannaatsuunissap attatiinnarneqarnissaa, eqqissisimanissaq innarliisoqannginnissaalu

pillugit suliassanik aalajangersimasunik aaqqiiviginninnissamik pingaartitsisarnissaat pillugit nunap immikkoortuani siunnersuisoqatigiit politidirektørimut innersuussuteqarsinnaasut siunnersuutigineqarpoq.

Unnerluussisussaataitasut aaqqissuussaanerat

Soorlu ullumikkut taamaattoq, Kalaallit Nunaanni pisortanit unnerluussisussaataitasut tassaapput naalagaaffiup eqqartuussissuserisua aamma politimesteri, aamma politimesteri pisortani unnerluussisussaataitasut naalagaaffiup eqqartuussissuserisuata toqqaannartumik ataaniippoq. Naalagaaffiup eqqartuussissuserisuata politimesterip pinerluttulerinernik suliaanik nakkutilliusuusaanera, aammalu pinerluttulerinermik inatsisitit malillugu malersuineq pillugu politimesterip aalajangiineri pillugit maalaarutinik suliarinnittarnissaa tamatuma kinguneraa.

Taamaalilluni politikredsinut allanut naleqqiullugu statsadvokatit suliarisartagaannik naalagaaffiup eqqartuussissuserisua Kalaallit Nunaanni Politiinut tunngatillugu suliassanik arlalinnik isumagisassaqaarpoq. Politikredsinut qullersatut oqartussaanerup malitsigisaanik suliassanik suliarinninnermi taamaammat statsadvokatit naalagaaffiup eqqartuussissuserisuanut naleqqiullugu annertunerujussuarmik ulluinnarni sullissinermik misilittagaqarput.

Aalajangiussat politikredsini allani aalajangerneqarsimasut pillugit naammagittaalliuterpassuarnik taamaalillutik statsadvokatit suliaqartarput, soorlu aamma politikredsit inatsisinik tunngaveqarlutik sulineri pillugit nalinginnaasumik nakkutillineq statsadvokatinit suliarineqartartoq. Taamaammat statsadvokatinut nuussinerep suliat taakku suliarineqarnerannut naleqqiullugu ingerlatsinermut iluaqutaassaaq, soorlu aamma suliassat politikredsinut allanut tunngassuteqartut suliarineqarnerannut naleqqiullugu assigiinnerusumik suleriaaseqarnissaaq qulakkeerneqassasoq.

Aammattaaq politiit pillugit aaqqissuusseqqinnermi naalagaaffiup eqqartuussissuserisuata pingaarnertut apeqqutinik sulianut tunngasunik nalinginnaasunik aamma eqqartuussisussaataitasuni allaffissornikkut ineriartortitsinermillu isumaginnittarnissaa piunasaqaataammat maluginiarneqassaaq.

Taamaalilluni, statsadvokatit politikredsinut allanut naleqqiullugu suliarisartagaat, kisianni Kalaallit Nunaanni Politiinut naleqqiullugu ullumikkut naalagaaffiup eqqartuussissuserisuanit isumagineqartartut, nunap immikkoortuani ataatsimi statsadvokatinit suliassatut akisussaaffigineqalernissaat taamatut siunnersuuteqarnikkut aallarnerniarneqarpoq.

Tamanna ilutigalugu statsadvokatit Kalaallit Nunaanni pisortani unnerluussisussaataitasunut ilanngunneqarnissaa siunnersuutigineqarpoq. Statsadvokatit - Danmarkimisut - naalagaaffiup eqqartuussiissuserisuanik pisortaqaassapput pingaarnertullu politiit pisortaannut pisortaassallutik. Taamaalilluni aaqqissuusaaneq eqqarsaatigalugu Kalaallit Nunaanni unnerluussisussaataitasut Danmarkimi unnerluussisussaataitasunut allanut naligiissinneqalerput. Tamatuma kingorna unnerluussisussaataitasut tassaalissapput naalagaaffiup eqqartuussissuserisua, statsadvokatit aamma politidirektøri.

Inatsisissatut siunnersuuteqarnikkut maannakkut suleriaatsimik allannguinnissaaq siunertarineqanngitsoq maluginiarneqassaaq, ileqquusullu malillugit sulisut politiit ilinniarsimasut aallaavittut eqqartuussisoqarfinni unnerluussisuusinnaapput.

Suliassat suliareqqitassanngortitsinernut tunngasut Kalaallit Nunaanni politiit isumagineqartut allanngortinneqannginnissaa siunnersuutigineqarpoq, tassami ilaatigut Kalaallit Nunaanni pissutsinik ilisimasaqarnerup aamma nunap sumiissusaata suliassat tamakku suli Kalaallit Nunaanni politiit suliarineqartarnissaaq pissutissaqartimmagu.

Politiinik naammagittaalliuutiginnissinnaaneq nutaaq

Politiini sulisut naammagittaalliuutigineqartarnerat aamma politiini sulisut pillugit pinerluttulerinermik suliassanik suliarinnittarnernut malittarisassanik naleqqussaasoqarnissaanik naammassinnittoqarnissaa inatsisissatut siunnersuutip ilaani uani siunertarineqarpoq.

Inatsisissatut siunnersuutip peqatigisaanik Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermi suliassanik suliarinnittarneq pillugu inatsit nr. 905, 16. decembari 1998-imeersoq atorunnaarsinneqassaaq.

Inatsisissatut siunnersuut Danmarkimi eqqartuussisarnermik inatsimmi allannguuterpasuarnik 2010-mi naammassineqartunik annertuunik tungaveqarpoq, siunissamilu Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq politiini sulisut sulinerminni pissusilersuutaat (pissusilersuutit pillugit naammagittaalliuutit) aamma politiini sulisut sulitillutik pissutsinik pinerluuteqarnermut tungassuteqartunik suliaqarsimasinnaanerit pillugu pinerluttoqarsimanermik paasiniaaneq ingerlattassagaat tamatuma kinguneraa.

Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermi suliassanik suliarinnittarneq pillugu inatsit nr. 905, 16. december 1998-imeersumi kapitali 2 aamma 4 malillugit Kalaallit Nunaanni Politimesterip aamma Kalaallit Nunaanni Politiit pillugit Naammagittaalliuuteqartarfiup, politiini sulisuusut sulinerminni pissusilersuutaat (pissusilersuutit pillugit naammagittaalliuutit) pillugit misissuinerit aalajangiisarnerillu pillugit suliassat Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup (Politiit pillugit naammagittaalliuuteqarnermut oqartussaasut) tigussagai siunnersuutigineqarpoq.

Inatsisip taaneqartup kapitalii 3 aamma 4 malillugit politimesterip aamma Kalaallit Nunaanni Politiit pillugit Naammagittaalliuuteqartarfiup politiini sulisuusut pillugit pinerluttulerinermi suliarisartagaat kiisalu politiit akuliunnerisa kingunerisaanik, imaluunniit politiit nakkutigineqartillutik inuit toqusimasut, imaluunniit annertuumik ajoqusersimasut pillugit suliarisartagaat, Politiit pillugit naammagittaalliuuteqarnermut oqartussaasut aamma tigussavaat. Inatsisissatut siunnersuut malillugu suli unnerluussisussaataasut (siunnersuut malillugu statsadvokatip aamma naalagaaffiup eqqartuussissuserisuata), unnerluussinissamik apeqqut isummerfigisassavaat aamma eqqartuussisoqassappat eqqartuussivimmi unnerluussisutut takkutissallutik.

Politiit pillugit naammagittaalliuuteqarnermut oqartussaasut sulianik sullissinissaani Kalaallit Nunaanni pissutsinik naammattumik ilisimasaqarnissap qulakkeerneqarnissaa siunertaralugu siunnersuisoqatigiinnik, suliassap paasissutissinneqarnissaanut atugassamik ilitersuutaasumik oqaaseqaateqartartussamik, Kalaallit Nunaanni Politiit pillugit Naammagittaalliuutigineqartut pillugit Siunnersuisoqatigiinnik taaneqartunik pilersitsisoqarnissaa siunnersuutigineqarpoq.

Kiisalu Politiit pillugit naammagittaalliuuteqarnermut oqartussaasut piginnaaneqartinneqarnerisa ataanni politiinut ikiortit inissinneqarnissaat siunnersuutigineqarpoq, tassami politiinut ikiortit politiit sumiiffinni politiit oqartussaasutut sulineranni ikiuuttarmata.

Immikkut isumagisassanngorlugit eqqartuunneqarsimasut inissiisarfimmit ammasumit Nuummi inissiisarfimmi immikkut isumagisarialinnut immikkoortotaqarfimmut nuunneqarnerat

Immikkut isumagisassanngorlugit eqqartuunneqarsimasut, sungiussiartuaartitsinermut atatillugu Kalaallit Nunaanni inissiisarfimmi ammasumi inissinneqartut, inissiisarfimmi ammasumiinnissaat naleqqutinngippat, imaluunniit inissiineq naammattumik isumannaatsuunngippat, Nuummi inissiisarfimmi immikkut isumagisarialinnut

immikkoortortaqarfimmut inissinneqarnissaat pillugu inatsisitigut tunngaveqarnissaq inatsisissatut siunnersuummi siunertaavoq.

Naalakkersuisut inatsisissatut siunnersuummut oqaaseqaataat

Kalaallit Nunaat patajaatsunik ingerlalluartunillu aamma ullutsinnut naleqquttunik suliaqqissutigineqartunillu suliarinnissinnaasunik politeeqarnissaa pingaarutilerujussuuvoq. Taamaammat aalajangiiffigisassatut siunnersuut manna Inatsisinik Atuutsitsinermi suliaasaqarfimmi pitsaassutsip qaffatsikkiartoreranut alloriarnerit ilagaat.

Tamanna ilutigalugu politiit najukkani inuiaqatigiinnik pitsaanerpaamik attaveqartarnissaat suleqatiginnittarnissaallu pingaaruteqartorujussuupput, taamaattumillu inatsisissatut siunnersuuteqarnikkut Danmarkimisut Nunap immikkoortuani Siunnersuisoqatigiinnik pilersitsisoqarnissaa Naalakkersuisut pitsaasutut isigaat. Nunap immikkoortuani Siunnersuisoqatigiit politiinut, Naalakkersuisunut Kalaallit Nunaanni borgmesterinut qitiusumik attaveqataassapput, aamma politidirektøri ukiut tamaasa najukkani suleqatigiinnissamik nunap immikkoortuani siunnersuisoqatigiinni oqaluuserineqartussamik tamanullu saqqummiunneqartussamik pilersaarusiortassaaq.

Kiisalu Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq politiini sulisuusut sulinerminni pissusilersuutaat pillugit misissuinissanut aalajangiinissanullu aamma politiini sulisut sulinerminni pinerluuteqarsimanerannik paasiniaanissamat piginnaatinneqalermata pingaaruteqarpoq, taamaalilluni arlaannaannulluunniit attuumassuteqanngitsumik misissuinissat qulakkeerreqassallutik.

Pisortani aningaasarsiornikkut allaffissornikkullu kingunerisassat

Soqanngilaq

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Justitsministeeriaqarfiup tusarniaaneq isumagaa, tusarniaanermilu kalaallit oqartussaasui attuumassuteqartut peqataatinneqarsimapput.

Tusarniaanermut akissutit pillugit tamakkiisumik takussutissiaq oqaaseqaasersugaq suliarineqareerpoq.